

दिनांक 24.07.2025

समय: 18.45 बजे

- भारत अर ब्रिटेन बीचे आज मुक्त व्यापार समझौता माथे सही करीजी— प्रधानमंत्री नरेन्द्र मोदी कह्यो—इण ऊं दोन्यू देशां री भेळी बरकत रो गेलो मिलेला।
- केन्द्रीय सहकारिता मंत्री अमित शाह आज राष्ट्रीय सहकारिता नीति 2025 जारी कीनी—नौकरी—धंधा रा मौका बधावण माथे ज़ोर।
- राज्यपाल हरिभाऊ बागडे हरियाळो राजस्थान अभियान रा तैत बत्ता ऊं बत्ता पौधा रोपण बाबत् कह्यो।
- प्रदेश मांय ई चौमासा मांय हाल तांई सामान्य ऊं 99 फीसदी बत्ती बिरखा व्ही—बीसलपुर बंधा रो दरुजो खोल र बत्तो पाणी निकाळ्यो जा रह्यो है।

000

भारत अर ब्रिटेन बीचे आज मुक्त व्यापार समझौता माथे सही करीजी। प्रधानमंत्री नरेंद्र मोदी ब्रिटेन रा दौरा रा तैत आज लंदन मांय ब्रिटेन रा प्रधानमंत्री कीर स्टारमर सागे बातचीत पाछे कह्यो के ओ करार भारत अर ब्रिटेन री भेळी बरकत रो गेलो बतावे है। श्री मोदी कह्यो के इण ऊं भारत रा नौजवानां, किसानां, मछुआरां अर एम.एस.एम.ई. कारोबार ने खास फायदो मिलेला।

ब्रिटेन रा प्रधानमंत्री कीर स्टारमर कह्यो के मुक्त व्यापार समझौतो यूरोपीय संघ छोड़्यां पाछे ब्रिटेन रो सब ऊं मोटो अर माली तौर ऊं सब ऊं खास कारोबारी करार है। श्री स्टारमर कह्यो के इण ऊं दोन्यू देशां ने घणो फायदो व्हेला।

000

केन्द्रीय गृह अर सहकारिता मंत्री अमित शाह आज राष्ट्रीय सहकारिता नीति 2025 जारी कीनी। नई दिल्ली रा अटल अक्षय ऊर्जा भवन मांय राख्यी ज्या जळसा मांय श्री शाह कह्यो के आ नीति दूरदर्शी, व्यावहारिक अर फायदेमंद साबित व्हेला। वे कह्यो के इण ने साल 2047 तांई री जरूरतां ने ध्यान मांय राखता थकां बणायी ज्यी है। वे कह्यो के नीति मांय सहकार से समृद्धि रा मकसद सागे नौकरी—धंधा रा मौका बधावण माथे ज़ोर दियो ज्यो है।

000

राजस्थान मेजर मिनरल ब्लॉक्स री नीलामी मांय देशभर मांय पहला पायदान माथे पूग ग्यो है। केंद्र सरकार साल 2016 मांय देश मांय प्रधान खनिज रा 500 ब्लॉक्स आवंटित कीना हा, ज्यां मांय प्रदेश ने ई 103 ब्लॉक आवंटित करी ज्या हा। वां मांय ऊं 64 ब्लॉक्स री नीलामी करी जा चुकी है। खान विभाग केवल 18 महीनां मांय आ उपलब्धि हासिल कीनी है। ध्यानजोग है के मेजर मिनरल ब्लॉक्स री नीलामी मांय राजस्थान री ई उपलब्धि रो कारण साफगोई सागे असरदार नीलामी प्रक्रिया है, जिण री केन्द्र सरकार ई सराहवणा कीनी है।

000

पाणी ऊं जुड़ी परियोजनावां रा काम रो जायजो लेवण सारू आज जयपुर मांय जल संसाधन मंत्री सुरेश सिंह रावत री सदरत मांय मीटिंग राख्यी ज्यी। ई मौके श्री रावत अहलकारां ने न्यारी—न्यारी परियोजनावां ऊं जुड़्या काम बेगा पूरा करण रा हुकम दीना। जल संसाधन मंत्री बिरखा रा पाणी रो जरूरी प्रबंधन करण बाबत् कह्यो।

000

राज्यपाल हरिभाऊ बागडे आज बालोतरा मांय अहलकारां सागे मीटिंग कर र जनता रा भला सारू चलायी जा रही न्यारी—न्यारी सरकारी योजनावां रा तैत कर्या जा रह्या काम रो जायजो लीनो। वे अहलकारां ने आं योजनावां रो फायदो हर एक पात्र जणा तांई पूगावणो तैय करण बाबत् कह्यो। नुवी शिक्षा नीति असरदार तरीका ऊं लागू करण माथे ज़ोर देता थकां राज्यपाल विद्यार्थियां रा दिमागी अर शारीरिक बूता ने एके सागे विकसित करण सारू कह्यो। वे पर्यावरण ने बचावण रा मकसद ऊं मिशन हरियाळो राजस्थान ने और असरदार बणावण रा हुकम दीना। ई

मौके वे एक पेड़ मां के नाम अभियान रे तैत पौधा ई रोप्या। ई पाछे राज्यपाल जालौर मांय अहलकारां सागे मीटिंग कर र ज़िला मांय चलायी जा रही न्यारी-न्यारी सरकारी योजनावां अर टी.बी.मुक्त ग्राम पंचायत अभियान री प्रगति री जाणकारी लीनी।

000

प्रदेश मांय ई चौमासा मांय हाल ताई सामान्य ऊं 99 फीसदी बत्ती बिरखा व्हे चुकी है। राज्य मांय औसतन 174 मिलीमीटर बारिश व्हे है। ई रे मुकाबले हाल ताई 374 मिलीमीटर पाणी बरस ग्यो है। ई बीचे न्यारी-न्यारी ठौड़ां चौमासा री बिरखा व्हे रही है। मौसम विभाग रे मुजब लारला चौबीस घंटा मांय सब ऊं बत्ती 9 सेंटीमीटर बिरखा बारां ज़िला रा अटरू मांय व्ही। बारां रा ही किशनगंज, शाहबाद, मांगरोल, छबड़ा अर छीपाबड़ौद मांय ई चोखो मेह व्ह्यो। ई सागे ई कोटा ज़िला रा रामगंजमंडी, मंडाना, सांगोद, झालावाड़ ज़िला रा मनोहरथाना, खानपुर अर अकलेरा मांय ई जम र पाणी बरस्यो। बूंदी, झुंझुनूं, अलवर, करौली, सवाईमाधोपुर अर सिरोही मांय ई बरसात रा समाचार है। चोखी बिरखा ऊं राज्य रा बंधां अर तळावां मांय लगातार पाणी आ रह्यो है। आज बीसलपुर बंधो पूरो भर्यां पाछे इण रो एक दरुजो खोल र बत्तो पाणी निकाळ्यो जा रह्यो है।

मौसम विभाग आज 13 ज़िलां मांय बारिश रो येलो अलर्ट जारी कीनो है। काल जयपुर, भरतपुर, कोटा, उदयपुर अर बीकानेर संभाग रा कुछ हलकां मांय बिरखा रा आसार है। ई बीचे मौसमी बीमारियां री शंका ने ध्यान राखता थकां राज्य सरकार सगळा ज़िलां मांय लार्वा ने पनपबा ऊं रोकण सारू जरूरी जतन कर रही है। पाली रा ज़िला कलेक्टर एल.एन. मंत्री जनता ऊं मौसमी बीमारियां ऊं बचाव सारू सावचेती राखण री अपील कीनी है।

000

हरियाली अमावस रे मौके आज प्रदेश रा न्यारा-न्यारा मिन्दरां मांय खास धार्मिक आयोजन राख्या जा रह्या है। ई मौके जातरू पवित्र सरोवरां मांय आस्था री डुबकी लगायी। भरतपुर री गौशालावां मांय गायां री पूजा कर र वां ने हर्यो चारो अर गुड़ खिलायी ज्यो। बारां रा सीताबाड़ी मांय संवारे ऊं ई मोटी तादाद मांय जातरू पूगण लाग्या। चित्तौड़गढ़ रा सांवलिया सेठ मिन्दर मांय ई आरे-सारे रा हलका ऊं जातरू पैदल पूग्या। हरियाली अमावस रे मौके केई ठोड़ां मेळा भर रह्या है। उदयपुर मांय ई रीति-रिवाज सागे मेळो भर रह्यो है। म्हाणा खबरनवीस बतायो के दो दिन रा ई मेळा मांय छह सौ ऊं बत्ती दुकानां लगायी ज्यी है।

हरियाळो राजस्थान अभियान रा तैत आज केई ठौड़ां मोटी मादाद मांय पौधा रोपी ज्या। संसदीय कार्यमंत्री जोगाराम पटेल जोधपुर री सांगरिया ग्राम पंचायत मांय एक पेड़ मां के नाम रोप्यो। ई मोके वे लोगां ऊं बत्ता ऊं बत्ता पौधा रोपण अर वां री देख-भाल करण री अपील कीनी। ब्यावर री कृषि उपज मंडी मांय करीब अढ़ाई लाख छायादार अर फलदार पौधा रोपी ज्या। नागौर रा पशु मेला मैदान मांय एक हजार पौधा रोपी ज्या। **सवाईमाधोपुर** मांय एक पेड़ मां के नाम अर हरियाळो राजस्थान अभियान रा तैत हाल ताई 8 लाख ऊं बत्ता पौधा रोप्या जा चुक्या है। **सलूम्बर** मांय एक पेड़ माँ के नाम" अभियान रा तहत स्कूली बच्चा 300 पौधा रोप्या। **बांसवाड़ा** ज़िला रा घाटोल मांय ई 50 ऊं बत्ता फलदार अर छायादार पौधा रोप र वां री देख-भाल री ज़िम्मेदारी लीरीजी। **चूरू** मांय ई केई ठौड़ां पौधा रोपी ज्या।

000

डीग ज़िला रा तीन हजार ऊं बत्ती आबादी वाळा गांवां मांय **अटल ज्ञान केन्द्र** खोल्या जावेला। चुण्डी ज्यी ग्राम पंचायतां मांय खोल्या जावण 47 ज्ञान केन्द्र आवता साल मार्च महीना ऊं सरू व्हे जावेला। म्हाणी खबरनवीस बतायो के आं केन्द्रां ऊं नौजवान नौकरी लागण सारू ली जावण वाळी परीक्षावां री तैयारी गांव मांय ई कर सकेला।

000

राजस्थान माध्यमिक शिक्षा बोर्ड कानी ऊं आवता साल लिया जावण वाळा मैट्रिक अर 12वीं रा इम्तिहान सारू ऑनलाइन तरीका ऊं अर्जी देवण रो काम सरू व्हे ग्यो है। सामान्य फीस सागे अर्जी 23 अगस्त ताई दे र 30 अगस्त ताई चालान प्रिंट सागे बैंक मांय फीस जमा करायी जा सके है। प्राइवेट परीक्षा देवण वाळा 11 सितम्बर ऊं अर्जियां दे सकेला।

000